

'Bangkit bersama lakar kejayaan negara'

Malaysia menjuarai Sukan SEA Ke-29 (KL2017) yang berakhir kelmarin. Sebelas negara Asia Tenggara - Malaysia, Thailand, Vietnam, Singapura, Indonesia, Filipina, Myanmar, Laos, Kemboja, Brunei dan Timor Leste menyertai temasya dwi tahunan itu. Rakyat Malaysia rasa bangga kerana atlet negara terdiri daripada pelbagai kaum dan etnik mencatatkan kejayaan terunggul, dengan 145 emas, 92 perak dan 86 gangsa.

Malaysia pernah muncul sebagai juara keseluruhan Sukan SEA pada 2001 dengan mengumpul 111 pingat emas, 98 perak dan 86 gangsa. Antara faktor utama menyumbang kepada kejayaan Malaysia dalam Sukan SEA 2017 adalah sokongan, dorongan dan doa rakyat berbilang kaum yang tidak berbelah bahagi kepada atlet negara.

Sambil beribu penyokong berbilang kaum menyaksikan atlet negara di stadium serta lokasi tertentu yang ada acara sukan selain jutaan menonton di televisyen, menzahirkan kegembiraan dengan sorakan setiap kali atlet Malaysia menjuarai kejohanan.

Malah, Sukan SEA 2017 kali ini menyaksikan seorang kerabat Di-

raja Malaysia, Sultan Mizan Zainal Abidin turut serta. Sultan Terengganu itu mengetuai kontinjen Malaysia memenangi dua pingat emas dan satu perak dalam acara kuda lasak 80 kilometer. Sultan Mizan yang menunggang Rtes Anniversary menyumbang pingat emas acara individu dan lebih membanggakan ialah apabila Sultan Mizan memecahkan rekod Sukan SEA untuk raih emas dengan catatan 3 jam 48 minit 38 saat.

Sesungguhnya, selain bidang kesukanan, Malaysia juga menempa kejayaan dalam pelbagai bidang, terutama bidang sosial dan ekonomi. Malaysia mendapat pengiktirafan pelbagai pihak seperti Bank Dunia, Tabung Mata Wang Antarabangsa dan Agensi penarafan kredit iaitu *Fitch* serta *Standard & Poor* atas kekuahan ekonomi negara yang kini mencecah 5.8 peratus, iaitu tertinggi pada peringkat global.

Pembangunan sosial

Dalam bidang pembangunan sosial, terutamanya dalam meningkatkan kualiti kehidupan rakyat, Malaysia berjaya meningkatkan pendapatan rakyat. Umpamanya, pendapatan penengah isi rumah mencecah RM4,585, kadar peng-

angguran sudah diturunkan kepada 3.4 peratus, yang dianggap sebagai sebuah negara yang bukan sahaja memiliki guna tenaga penuh di dunia, malah berjaya menghapuskan kemiskinan tegar.

Kerajaan juga melaksanakan pelbagai program dalam merealisasikan impian rakyat memiliki rumah sendiri yang selesa. Selain itu, baru-baru ini Malaysia berjaya mewujudkan Zon Perdagangan Bebas Digital (DFTZ) bersama Jack Ma, sebuah Zon DFTZ pertama di luar China dalam menjadikan Malaysia sebagai hab ekonomi digital pada masa akan datang.

Rakyat Malaysia harus rasa bangga kerana negara kini lokasi lima universiti antara 300 universiti terbaik dunia, yakni Universiti Malaya, Universiti Kebangsaan Malaysia, Universiti Sains Malaysia, Universiti Putra Malaysia dan Universiti Teknologi Malaysia.

Universiti Malaya yang mencapai ranking ke-167 dunia pada 2013, mencapai ranking 114 pada 2017, manakala lima daripada lapan universiti terbaik dalam ASEAN adalah terdiri daripada universiti di negara kita iaitu Universiti Malaya di tangga ke-3, Universiti Putra Malaysia ke-4, Universiti Kebangsaan Malaysia ke-5,

Universiti Teknologi Malaysia ke-7 dan Universiti Sains Malaysia ke-8.

Kejayaan cemerlang

Kejayaan cemerlang Malaysia dalam SEA 2017 jelas menunjukkan rakyat Malaysia boleh mencapai kejayaan besar sekiranya bersatu hati dan jiwa dalam melakukan apa sahaja demi kepentingan negara. Justeru, rakyat harus bertekad melestarikan serta semarakkan semangat 'bangkit bersama' yang ditunjukkan dalam SEA 2017 dalam lain-lain bidang bagi kepentingan negara.

Malah rakyat wajar menterjemahkan momentum kejayaan Sukan SEA 2017 dalam menjayakan impian Dasar Transformasi Nasional (TN50), yang dijangka akan dilaksanakan tidak lama lagi, iaitu satu pendekatan pembangunan rakyat yang bersifat holistik.

Apapun, marilah kita mengucapkan terima kasih kepada kerajaan yang menyediakan bajet RM145 juta untuk melatih atlet Sukan SEA. Ucapan syabas kepada skuad negara atas kejayaan cemerlang dan kepada Menteri Belia dan Sukan, Khairy Jamaluddin, atas pelancaran 'program kita juara' yang menghasilkan kejayaan terunggul bagi Malaysia dalam SEA 2017.

Komentar



Datuk M Periasamy

Felo Jabatan Hal Ehwal Khas (JASA), Kementerian Komunikasi dan Multimedia